



Кун нафаси



Ўзбекистон Президенти Шавкат Мирзиёевнинг таклифи биноан Тожикистон Президенти Имомали Раҳмон жорий йил 2-3 июнь кунлари расмий ташриф билан мамлакатимизда бўлади.



Ўзбекистон Республикасининг «Кўп квартиралар уйлари бошқариш тизими такомиллаштирилиши муносабати билан Ўзбекистон Республикасининг айрим қонун ҳужжатларига ўзгартиш ва қўшимчалар киритиш тўғрисида»ги қонуни қабул қилинди.

Давлатимиз раҳбари «Истеъмол бозорларида нархлар барқарорлигини таъминлашга ва монополияга қарши чораларнинг таъсирчанлигини оширишга доир қўшимча чора-тадбирлар тўғрисида»ги фармонида имзо чекди.



Тошкентда «Марказий Осиенинг барқарор ривожланишини таъминлашда Ўзбекистон ва Тожикистон ўртасидаги стратегик шерикликнинг аҳамияти» мавзусида халқаро илмий-амалий конференция ташкил этилди.


Бош прокуратурада Республика ҳуқуқни муҳофаза қилувчи органлари мувофиқлаштирувчи Кенгашининг навбатдаги йиғилиши ўтказилди.



2022 йилнинг 2-4 июнь кунлари Европада хавфсизлик ва ҳамкорлик ташкилотининг (ЕХХТ) амалдаги раиси, Польша ташқи ишлар вазири Збигнев Рау Ўзбекистонга ташриф буюради.





Фарғона шаҳрида Жанубий Корея халқаро ҳамкорлик агентлиги – KOICA билан шерикликда касб-хунарга ўқитиш маркази очилди.



Инновацион ривожланиш вазирида «Springer Nature» компаниясининг Марказий Осиедаги вакиллари ҳамкорлигида «Springer Nature ахборот ресурслари – Ўзбекистон олий таълим муассасалари ва илмий ташкилотларининг илмий-тадқиқот ва нашр фаолиятини ошириш воситаси сифатида» мавзусида семинар-тренинг бўлиб ўтди.

Келгуси сонларда ўқинг...



# Ishonch

Юрт тараққийети йўлида бирлашайлик!

2022 йил  
2 июнь  
пайшанба  
№ 70  
(4666)

Ўзбекистон касба уюшмалари Федерацияси нашри • Газета 1991 йил 21 мартдан чиқа бошлаган • www.ishonch.uz • e-mail: ishonch1991@yandex.uz



Андижон вилояти

## Касаба уюшмалари –

Акция

# БОЛАЛАРГА!



Андижон шаҳридаги «Баркамол авлод» мактабида 1 июнь – Халқаро болаларни ҳимоя қилиш куни муносабати билан «Касаба уюшмалари – болаларга» акцияси доирасида «Болаларга беринг дунёни!» деб номланган тантанали тадбир ўтказилди.

Унда 280 нафар кам таъминланган, боқувчисини йўқотган, яқка-ёғиз ва кўп болали оилаларнинг фарзандлари қатнашди. «Баркамол авлод» болалар мактабининг тўгарак аъзолари тенгдошларига беғубор ёшликни тараннум этувчи бадий-музыкали дастур намойиш этишди.

Шунингдек, турли мусобақалар ва савол-жавоблар викторинаси ўтказилди. Болажонларга ўқув қуроллари ва ҳойиллар томонидан турли хил ўйинчоқлар тарқатилди. **Насибохон Тўрақуллова,** Таълим ва фан ходимлари касаба уюшмаси Андижон шаҳар кенгаши раиси



Фарғона вилояти

Ҳуқуқ

## Даъвогар ҳақ эди, аммо...

Фуқаролик ишлари бўйича Фарғона туманлараро судининг 2022 йил 14 мартдаги ҳал қилув қарори билан Барно Фозилованинг ишга тиклаш масаласида қилган даъво аризаси қаноатлантиришсиз қолдирилди.

Ўрганишлар ўтказилгач, Ўзбекистон касаба уюшмалари Федерацияси Фарғона вилояти кенгаши меҳнат ҳуқуқ инспектори Барно Фозилованинг бузилган ҳуқуқларини тиклаш мақсадида фуқаролик ишлари бўйича Фарғона вилоят судига фуқаронинг номидан апелляция инстанциясига шикоят аризаси киритди.

Суд давомида «Асака банк» АЖ томонидан Барно Фозилованинг нисбатан муддатли меҳнат шартномаси тузиш ва муддатли меҳнат шартномасини бекор қилиш ҳақида чиқарилган буйруқларда қонун бузилиши ҳолат-

лари ҳамда фуқаролик ишлари бўйича Фарғона туманлараро судининг 2022 йил 14 мартдаги ҳал қилув қарориди ҳолат тўлиқ ўрганилмагани меҳнат ҳуқуқ инспектори томонидан етарлича далиллар ва қонунлар билан исботлаб берилди.

Юқоридагиларга асосан фуқаролик ишлари бўйича Фарғона вилояти судининг 12 майдаги ҳал қилув қарориди фуқаролик ишлари бўйича Фарғона туманлараро судининг 2022 йил 14 мартдаги ҳал қилув қарори бекор қилиниб, «Асака банк» АЖнинг Барно Фозилова билан тузил-

ган меҳнат шартномасини бекор қилиш тўғрисидаги буйруғи ғайриқонуний деб топилиб, Барно Фозилова ўз ишига тикланди. Унга иш берувчи томонидан етказилган маънавий зарар учун 5 миллион сўм, мажбурий проғул вақти учун 21 миллион сўм миқдориди пул маблағлари ундирилиши белгиланди.

**Мансуржон УСМОНОВ,** Ўзбекистон касаба уюшмалари Федерацияси Меҳнат инспекциясининг Фарғона вилояти бўйича меҳнат ҳуқуқ инспектори



Сурхондарё вилояти

Сурхондарё вилояти ҳокимлигига!

## НУРОНИЙЛАРНИНГ ИШ ҲАҚИНИ КИМ ТўЛАЙДИ?

Президентимизнинг 2020 йил 18 февралдаги «Жамиятда ижтимоий-маънавий муҳитни соғломлаштириш, маҳалла институтини янада қўллаб-қувватлаш ҳамда оила ва хотин-қизлар билан ишлаш тизимини янги даражага олиб чиқиш чора-тадбирлари тўғрисида»ги фармонининг 6-бандига биноан «Нуроний» жамғармаси ва вилоят, туман-шаҳар бўлимлари тугатилди.



Улар ҳеч бўлмаганда ойлик маошини ундириб олишдан умидвор. Шу мақсадда ҳатто «Маҳалла» хайрия жамоат фондига бир неча марта мурожаат йўллаган. Лекин натижа йўқ.

Ватан равнақи йўлида астойдил меҳнат қилган нуронийлар иш ҳақини яна қанча кутиши керак? Мутасаддилар бунга нима дер эканлар?

**Абдукарим ҲАЙДАРҚУЛОВ,** собиқ «Нуроний» жамғармасининг Термиз тумани бўлими раиси

Бу тушунарли. Аммо... Жамғарманнинг Сурхондарё вилояти бошқармасида самарали фаолият юритган нуронийлар фаоллари ойлик маошини, солиқ тўловлари, коммунал тўловлар, алоқа ва бошқа хўжалик юритувчи субъектлардан жами 277,1 миллион сўм миқдориди маблағини қайтариб ололмай сарсон-саргардон бўлиб юришибди.



Сирдарё вилояти

Сирдарё «Мурувват» ногирон аёллар учун интернат уйида «Меҳнатни муҳофаза қилиш тўғрисида»ги қонун ҳамда жамоа шартномаларидаги бандлар ижроси юзасидан ўрганиш ўтказилганда ишловчи ҳодимлар учун белгиланган имтиёз бажарилмай, меҳнат ҳуқуқлари поймол бўлгани аниқланди.

Ўрганиш

## ИМТИЁЗ НЕГА АМАЛДА ЭМАС?

Гап шундаки, тиббиёт ходимлари махсус кийим – халат ва қалпоқ билан таъминланмай, чикимдор бўлишларига йўл қўйилган.

Ваҳоланки, Меҳнат кодексининг 217-моддаси, «Меҳнатни муҳофаза қилиш тўғрисида»ги қонуннинг 18-моддаси ҳамда вазирилик ва тармоқ касаба уюшмаси Республика кенгаши ўртасида тузилган «Тармоқ келишувининг 6.6-бандида соғлиқни сақлаш ва тиббиёт ишлаб чиқариш ходимлари учун махсус кийим, махсус пойабзал ва бошқа яқка тартибда ҳимояланиш воситаларини бепул бериш назарда тутилган. Қолаверса, муассасанинг амалда бўлган жамоа шартномасида ҳам бу имтиёз белгиланган.

Ушбу камчиликларни бартараф қилиш бўйича интернат уйи директори номига ёзма кўрсатма киритилди. Шундан сўнг 36 миллион 270 минг сўмга тиббий халат ва тиббий қалпоқ харид қилинди ва 130 нафар тиббиёт ходими махсус кийим билан таъминланди.

**Аброр ҒАНИЕВ,** Соғлиқни сақлаш ходимлари касаба уюшмаси Республика кенгаши Сирдарё вилояти бўйича меҳнат техник инспектори



«Ishonch»га жавоб берадилар

## Ҳуқуқий идоралар хулосаси керак

«Ishonch» газетасининг 2022 йил 5 апрелдаги «Механизм мурвати соз... эмас(ми?) сарлавҳали мақола эълон қилинган эди. Ҳисоб палатаси ушбу мақолага қўйидагича муносабат билдирди:

Ҳисоб палатаси фаолиятининг очиқлиги ва шаффофлигини таъминлаш мақсадида доимий равишда назорат тадбирларида доир амалга оширилган ишлар ҳақида жамоатчиликни хабардор этиб келмоқда.

Таъкидлаш жоизки, ҳар бир оқиб борилаётган назорат тадбирлари натижасида аниқланган ҳолат хато-камчиликлар, хусусан, қонунбузилиш ҳолатлари бўйича тўпланган ҳужжатлар айнан ҳолатга ва ҳаттоликка сабабчи бўлган масъул мансабдор шахслар фаолиятига тегишли ҳуқуқий баҳо бериш учун ҳуқуқни муҳофаза қилувчи органларга юборилмоқда.

Шу ўринда, мақолада қайд этилганидек, аниқланган тегишли қонунбузилиш ҳолатлари бўйича Молия вазирилик Фазначилик бўлиминининг бевосита алоқадорлиги ёки масъулиятсизлиги аниқланган ҳолатларда фақатгина суд ва ҳуқуқни муҳофаза қилувчи органлар томонидан қонунчиликка мувофиқ ҳуқуқий баҳо берилиши ва тегишли қонуний чоралар қўрилишини маълум қиламиз.

Ҳисоб палатаси шўба мудири 3.Иватов



Бухоро вилояти

# ОРОМГОҲЛАР КУЧОҚ ОЧМОҚДА

**Бу йил Бухоро вилоятида ёзги мавсумда 17825 нафар ўғил-қиз соғломлаштирилиши режалаштирилган.**

Бу ҳақда болаларни дам олдириш ва соғломлаштириш ишлари ташкилоти раҳбари, таълим вақиллари кўриши ҳамда мавсумни юқори савияда ўтказишга оид комплекс чора-тадбирлар ва кўрсатмалар ижросига бағишлаб ўтказилган ўқув-семинарда батафсил маълумот берилди.

Тадбирда соғломлаштириш майдончалари, «Баркамол авлод» болалар мактаблари туман-шаҳар бўлимлари, маънавий-ахлоқий тарбия ва болаларни ижтимоий ҳимоялаш бўйича шўъба раҳбарлари қатнашди. Қайд этиш лозимки, мавсум давомида вилоятдаги 145 та стационар – шаҳарорти ва кундузги оромгоҳларда 17 минг 825 нафар ўғил-қиз соғломлаштирилиши режалаштирилган. Шундан 11 та стационар оромгоҳда 6 минг 650 нафар, 134 та кундузги оромгоҳда 11 минг 175 нафар боланинг соғломлаштирилиши кўзда тутилган.

Семинарда ҳамкор ташкилотлар ходимлари билан биргаликда тадбир иштирокчиларига оромгоҳларнинг моддий-техник базасини мустаҳкамлаш, ўғил-қизларнинг мазмунли дам олишларини таъминлаш, кутубхоналар фондини бойитиш сингари қатор муҳим масалалар бўйича тегишли тавсиялар берилди.

**Адолат АКРАМОВА,**  
Ўзбекистон касоба уюшмалари Федерацияси Бухоро вилояти кенгаши бўлим мудир



Фарғона вилояти

**Қувасой шаҳридаги «Ниҳол» болалар оромгоҳида жорий йилги ёзги соғломлаштириш мавсумини намунали ўтказишга бағишланган ўқув-семинар ташкил этилди.**

# МАВСУМ КҮНГИЛДАГИДЕК ЎТАДИ

Унда Фарғона вилояти мувофиқлаштирувчи гуруҳ аъзолари, оромгоҳ раҳбарлари, бош тарбиячилар, етакчилар, тўғрак раҳбарлари, спорт мураббийлари, ҳисобчилар, ошпазлар ҳамда оромгоҳда фаолият юритадиган тиббиёт ходимлари иштирок этишди.

Қайд этиш жоизки, бу йилги ёз мавсумида вилоятдаги 17 та стационар оромгоҳда 11 минг нафар болани дам олдириш ва соғломлаштириш режалаштирилган.

Семинарда асосий масалалар қаторида оромгоҳларда хавфсизлик чораларини кўриш, ўғил-қизларга мазмунли дам олишлари учун зарур шарт-шароитлар яратиш, малакали тиббий хизмат кўрсатиш, озиқ-овқат маҳсулотлари сифатини назорат қилиш, шунингдек, болажонларнинг сузиш ҳавзаларида чўмилиши фақат сузиш инспекторлари назорати остида амалга оширилиши лозимлиги қайд этилди.

– Жорий мавсумда 1 минг 200 нафар ўғил-

қизни қабул қиламиз, – дейди «Кимёгар» болалар оромгоҳи раҳбари Саодатхон Мўминова. – Болажонларнинг мазмунли дам олиши учун барча шарт-шароитлар яратилган. Ошхона, ётоқхона, сузиш ҳавзаси таъмирдан чиқарилди. Энг асосийси, малакали педагог ходимларни ишга жалб қилганмиз.

– Ўтган йилги танқидлардан тўғри хулоса чиқарган ҳолда, мавсумга тайёргарлик ишларини анча эрта бошладик, – дейди Олтиариқ туманидаги «Юлдуз» болалар оромгоҳи раҳбари Баҳодир Холмиров. – Оромгоҳга салкам 2 километр масофадан ичимлик сув тортиб келинди. Душлар бутунлай янгиланди. Оромгоҳ ҳудудидаги ички йўллар таъмирланди. Ишончим комилки, болажонлар «Юлдуз»да эсда қоларли ҳордиқ чиқаришади.

Семинар иши шўъбаларга бўлинган ҳолда давом этди.

**Жамшид ЭРГАШЕВ,**  
«ISHONCH»



Қашқадарё вилояти

**Қарши шаҳар халқ таълими бўлими томонидан шаҳардаги 1-интисослаштирилган давлат умумтаълим мактабининг бир қатор ходимларига «ҳайфсан» интисозий жазоси қўлланилди.**

Бундан норози бўлган ходимлар вазият юзасидан Таълим ва фан ходимлари касоба уюшмаси Қарши шаҳар кенгашига мурожаат қилишди. Кенгаш раиси Шерзод Йўлдошев мурожаатни ўрганиш асносида интисозий жазо қўлланилиши чоғида Меҳнат кодекси талабларига риоя этилмаганини аниқлади ва бу ҳақда Халқ таълими бўлимига кўрсатма тайёрлади. Қўлланилган интисозий жазо шу асосда бекор қилинди.

Ташкент ахборот технологиялари университети Қарши филиалининг киме фани ўқитувчиси Лобар Худойбердиева кет-

ма-кет икки марта жароҳлик амалиётини бошидан ўтказди. Муаллимага соғлиғини тиклаши учун шаҳар кенгаши моддий ёрдам ажратди.

Шаҳардаги 27-мактабнинг жисмоний тарбия ўқитувчиси Азизбек Турдиев оёғидан жароҳат олди ва «операция» столига ётишга мажбур бўлди. 28-давлат мактабгача таълим ташкилоти ёрдამчи тарбиячиси Шаҳноза Тўраеванинг бошига мусибат тушди, ота-онасидан ажраб қолди. «Баркамол авлод» мактаби ходимаси Хуснида Тоҳированинг эса волидаси вафот этди.

Юқоридаги синовили ҳолатларда касоба уюшмалари ходимларнинг яқин ҳамдарди бўлди. Шаҳар кенгаши томонидан уларга кўмак берилди. Умуман олганда, йил бошидан буён 80 нафарга

яқин кам таъминланган, ёш оила вакилларига шу тариқа моддий ёрдამлар тақдим этилди.

Ўзбекистон касоба уюшмалари Федерацияси ва Халқ таълими вазирлиги ўртасида имзоланган қўшма қарорга кўра, Қарши шаҳридан ўтган йили 46 нафар педагог «Қашқадарё соҳили» санаторийсида бепул дам олдирилган бўлса, бу йил яна 16 нафар халқ таълими методисти ёки мактаб директорини соғломлаштириш режалаштирилган. Ҳозирча уларнинг 6 нафари ўз саломатлигини тиклади.

Январь ойидан бугунгача 600 нафардан зиёд ходимнинг Бухоро, Самарқанд вилоятлари ҳамда вилоятдаги зиёратгоҳ жойларга саёҳати ташкил қилинди.

Жамоа шартномаларига кўра, 8 нафар

Аъзолик афзалликлари

# Ёнингиздаги кўмақдош

пенсияга чиқайётган ходимга бир марталик моддий ёрдამ берилди. 7 нафар фахрийга юбилей саналари муносабати билан совғалар тақдим қилинди. Тармоқ тизимида фаолият олиб бораётган 24 нафар ходимнинг яқин қариндошларига санаторий йўлланмалари ажратилди.

Ҳозиргача 30 та нодавлат мактабгача таълим муассасасида касоба уюшма ташкилоти тузилди ҳамда улар шаҳар мактабгача таълим бўлими касоба уюшма кўмитасига бириктирилди. Қисқа вақтда улар аъзолик афзалликларини ҳам ҳис қилишмоқда. Масалан, яқинда нодавлат секторда ишлайдиган 4 нафар ходимга моддий ёрдამ ажратилди.

**Акмал АБДИЕВ,**  
«ISHONCH»



Хоразм вилояти

Миннатдорлик

**35 йилдан буён ҳамшира бўлиб ишлайман. Фаолиятим давомида меҳнатимизни касоба уюшмалари томонидан кўп бор эътироф этилганига гувоҳ бўлдим.**



# МЕҲРНИ МУДОМ ҲИС ЭТАМИЗ

Айниқса, ташкилотнинг ўрта тиббиёт ходимларига бераётган эътибори катта. Иш берувчи ва ходим ўртасида бирор англашилмовчилик юзага келса, биринчи навбатда касоба уюшмасига мурожаат қиламиз. Соғлиқни сақлаш ходимлари касоба уюшмаси Хоразм вилояти кенгаши раиси Рашид Йўлдошев, раис ўринбосари Гулҳоним Аминова масалани тезкорлик билан ҳал қилишади.

Ҳар йили «Ҳамшира» танлови, меҳнат қонунчилигига доир билим ва кўникмаларни мустаҳкамлаш мақсадида амалий семинарлар ўтказиб келинмоқда. Ҳамширалар ўртасида спорт мусобақалари уюштириш анъанаси айланган. Кўплаб тиббиёт муассасаларида соғломлаштириш хоналари, спорт майдончалари ташкил қилинган.

Яқинда вилоятимиз тиббиёт ходимлари Бухоро ва Самарқанд шаҳарларига саёҳатга боришди. Улар орасида бизнинг муассасамиз ҳамширалари ҳам бор. Ушбу саёҳат бизда унутилмас таассурот қолдириди.

Бизни ҳар доим кўллаб-қувватлаб, меҳр ва эътибор марказида тутиб келаётган касоба уюшмаларидан миннатдоримиз.

**Роза АЛЛАЯРОВА,**  
Хоразм вилояти силга қарши курашиш диспансери бош ҳамшираси



Навоий вилояти

**Кейинги йилларда иш берувчиларнинг ишчи-ходимларни меҳнат қонунчилигига амал қилмасдан ишдан бўшатилиш ҳолатлари кўп учрамоқда. Бундан шунга қўйиб бораётганидан ҳам билиш мумкин.**



Семинар

# ДОЛЗАРБ МАВЗУДА МУЛОҚОТ

Яқинда Навоий вилояти Маърифат ва маънавият марказида иш берувчи ва ходим ўртасидаги долзарб муаммолари масалаларни аниқлаш, уларни бартараф этиш юзасидан семинар бўлиб ўтди.

Унда фуқаролик ишлари бўйича Навоий вилояти суди судьяси Феруз Ҳамидов, Ўзбекистон касоба уюшмалари Федерацияси Навоий вилояти кенгаши меҳнат ҳуқуқ инспектори Алишер Раҳматов ва вилоят бандалик бош бошқармасининг меҳнат ҳуқуқ инспекцияси бошлиғи ўринбосари Нодир Жўраев сўзга чиқиб, меҳнат қонунчилиги билан боғлиқ янгиликлар, тартиб-қоидалар ҳамда ходимларни ишдан бўшатилганда амалдаги ҳужжатларга амал қилиш лозимлиги хусусида фикр-мулоҳазаларини билдиришди.

Тадбирда қатнашчилар меҳнат қонунчилигига боғлиқ саволларига атрафлича жавоб олишди.

**Алишер РАҲМАТОВ,**  
Ўзбекистон касоба уюшмалари Федерацияси Навоий вилояти кенгаши меҳнат ҳуқуқ инспектори





